

Covid-19 dorong sistem kesihatan cari cara lebih baik: Ye Kung

► **FARID HAMZAH**
farid@sph.com.sg

MENTERI Kesihatan Encik Ong Ye Kung berkata wabak Covid-19 telah mendorong sistem jagaan kesihatan untuk memikirkan semula kaedah cara lama, dan melakukannya secara berbeza dan lebih baik.

Pada masa yang sama kakitangan jagaan kesihatan dinasihatkan agar kerja kritikal dan strategik mereka tidak terjejas dek krisis, tambah Encik Ong.

Menyatakan demikian di Majlis Anugerah Penghormatan Sistem Kesihatan Universiti Nasional (NUHS) malam semalam, Encik Ong berkata pandemik Covid-19 telah meletakkan tekanan ke atas sistem jagaan kesihatan dan pekerja jagaan kesihatan di merata dunia termasuk Singapura.

“Krisis seperti Covid-19 mendorong kita untuk memikirkan semula kaedah cara lama, dan melakukannya secara berbeza dan lebih baik.

“Ternyata NUHS telah mengubah cabaran itu menjadi peluang dengan merencanakan inisiatif bagi menangani keperluan yang kian berubah,” ujarnya.

Kata Encik Ong, salah satu daripadanya adalah NUHS mendakap jagaan kesihatan digital.

Ini termasuk telekonsultasi, penghantaran ubat ke rumah, dan transaksi tanpa kontak yang menjadi sebahagian daripada norma baru di NUHS bagi para pesakit yang mendapat jagaan dan perkhidmatan di luar hospital.

Menyentuh tentang satu lagi daya tahan penting, Encik Ong mengingatkan agar pihak jagaan kesihatan tidak biarkan krisis mem-

songkan kerja kritikal dan strategik mereka.

“Menerusi pandemik ini, NUHS memberi penekanan dengan usaha pembangunan semula kampus Kent Ridge dan Alexandra,” tambahnya.

Kampus Kent Ridge yang baru merupakan bahagian penting perluasan prasarana jagaan kesihatan bagi memenuhi permintaan penduduk yang menua, dan menambah nilai kepada kapasiti latihan bagi kakitangan jagaan kesihatan.

Pembangunan semula Kampus Alexandra pula akan mengubah hospital itu menjadi sebuah hospital umum bersepadu dengan khidmat menyeluruh dalam jagaan bersepadu, perubatan geriatrik, perubatan sokongan dan paliatif, perubatan pemulihan, dan psikologi, serta pembedahan ambulatori.

Di acara itu semalam seramai 80 penerima telah disampaikan dengan Anugerah NUHS, Anugerah NUHS-Mochtar Riady Pinnacle, dan Anugerah Klinisian Kanan Terbilang.

Anugerah-anugerah tersebut juga termasuk pangkat kehormat Konsul-

tan Emeritus kepada 14 klinisian kanan yang meraih pencapaian berkesan sepanjang kerjaya perubatan mereka.

Empat yang lain pula dihargai di atas kepimpinan mereka serta impak transformasi ke atas jagaan kesihatan.

Salah seorang penerima Anugerah NUHS-Mochtar Riady Pinnacle – Anugerah Klinisian Pakar dan Anugerah Berpasukan, Profesor Madya Zubair Amin, merupakan Ketua dan Konsultan Kanan di Jabatan Neonatologi, Khoo Teck Puat – Institut Perubatan Kanak-Kanak Universiti Nasional di Hospital Universiti Nasional (NUH).



ENCIK ONG YE KUNG



CUKUP MEMBANGGAKAN: Profesor Madya Zubair (*kiri*) bersama Encik Kwek Wee Liang, isterinya Cik Wong Mei Ling dan bayi pramatang Kwek Yu Xuan serta salah seorang kakitangan jagaan kesihatan NUHS sejurus sebelum bayi tersebut dibenarkan pulang tahun lalu. – Foto NUHS

Jasa pakar jagaan bayi pramatang diiktiraf

BELIAU memimpin pasukan neonatal yang menjaga bayi pramatang paling ringan yang pernah dilahirkan di dunia, Kwek Yu Xuan.

Yu Xuan, hanya seberat 212 gram semasa lahirnya pada 9 Jun dua tahun lalu di NUH di tengah-tengah pandemik Covid-19.


Dia begitu kecil dan “mempunyai peluang hidup yang terhad”, pada ketika itu.

Setelah dilahirkan, Yu Xuan dirawat di unit rawatan intensif neonatal (NICU) selama 13 bulan.

Dia dibenarkan pulang pada 9 Julai tahun lalu – sekitar 13 bulan selepas dilahirkan.

Si kecil kini berusia dua tahun dan berada dalam keadaan sihat.

Inilah antara cabaran yang dihadapi Profesor Madya Zubair Amin, Ketua dan Konsultan Kanan di Jabatan Neonatologi, Khoo Teck Puat – Institut Perubatan Kanak-Kanak Universiti Nasional di Hospital Universiti Nasional (NUH) dan pasukannya yang menerima Anugerah NUHS–Mochtar Riady Pinnacle – Anugerah Klinisian Master dan Anugerah Berpasukan.



PROFESOR MADYA ZUBAIR AMIN

Semasa dihubungi, Profesor Madya Zubair berkata:

“Apabila bayi sedemikian dilahirkan, kami mempunyai sepasukan pakar yang mahir dalam bidang masing-masing untuk sama-sama membantu – memastikan kelahiran yang selamat.

“Pucuk pangkalnya, ia merupakan ker-

jasama semua pihak termasuk ibu bapa bayi untuk memastikan kesejahteraan si kecil terus terjamin semasa di hospital ini, rumah dan semasa membuat rawatan susulan.”

Majlis penyampaian anugerah yang berlangsung di The Capella itu menyambut pencapaian para profesional dan pentadbir jagaan kesihatan NUHS yang cemerlang.

Ia menghargai kakitangan di atas perbezaan yang mereka buat, dengan tujuan membina masyarakat sihat, membentuk cara perubatan dan mengubah jagaan di Singapura menerusi jagaan, kajian, dan pendidikan untuk pesakit.

Dalam ucapannya Ketua Eksekutif NUHS, Profesor Yeoh Khay Guan, berkata NUHS kini merupakan sebuah sistem kesihatan akademik dengan kakitangan dan pasukan yang menyumbang dalam tiga misi bersilang – jagaan klinikal, pendidikan dan kajian.

“Setiap hari kami merawat ribuan pesakit dalam tiga hospital akut, tiga pusat khusus nasional, tujuh poliklinik dan kemudahan perubatan yang luas,” katanya.